

REGIONAL NEWS BULLETIN

HEADLINES (EVENING)

- 1. Lengpui airport venhim hna chu Ministry of Home Affairs thupek angin vawiin atang khan Central Industrial Security Force (CISF) kutah hlan a ni.
- 2. Mizoram leh Assam ramri chungchanga inbiakna State Secretary-level meeting nei turin Mizoram team ten Guwahati khawpui an pan.
- 3. Prime Minister Narendra Modia chuan firfiakte leh anmahni puitute chu an chhui ang a, an zawn chuah hnuah hremna na tak an pe dawn tih a sawi
- 4. Pahalgam firfiaka chetna a thlen hnu lawkah India chuan Pakistan mite tan Visa a tihtawpsak.

<><><>

LENGPUI AIRPORT SECURITY HANDED OVER TO CISF

Lengpui airport venhim hna Mizoram Police leh CRPF in an thawh mek chu Ministry of Home Affairs thupek angin vawiin atang khan Central Industrial Security Force (CISF) kutah hlan a ni.

Hlanna inkhawm hmanpuitu Mizoram Police DGP Pu Anil Shukla chuan Mizoram airport chu venhim ngai tak a nih thu sawiin ralthuam, ruihhlo leh dan phal loh thil kar tin deuh thawh lakluh a ni thin a ti a, CISF ten venhim hna an thawh chuan Lengpui airport chu a him phah sawt dawn a, puih an ngaih phawt chuan Mizoram police te pui tura an inhuam reng thu a sawi a ni.

CISF IG Pu Vijay Prakash pawhin thu sawiin vawiina an kuta Lengpui airport venhimna dah thar a ni chu thil chhinchhiah tlak tak, ram chhunga hmasawna ruhrel pawimawh hrang hrang venghim tura CISF te inpekna tarlangtu pawimawh tak a ni a ti a. CISF chu Central Armed Police Force lian ber pathumna a nih mek thu leh thu leh a bik taka airport venhim dan tur training pek thlap an nih thu a sawi a, hmasawna ruhrel pawimawh hrang hrang, sorkar hmun, kawlphehtha siamna tur tuikhuah bakah, lungalhthei khur, kawlphehtha lakna hmunpui, airport leh industry pawimawh hrang hrang an ven thin thu a sawi.

Kan corr report lo ngaithla zui ang.

Mizoram DGP Pu Anil Shukla chuan lengpui airport venhim hna thawh mek Mizoram police te leh CRPF te thlak tur CISF te a lalut a. CISF te hi Deputy

Commandant pakhat ho na hnuaiah mi 121 an rawn dah phawt dawn a. A hnuaiah a awm tur zat dik tak mi 214 an rawn dah dawn a ni. CRPF te hian zingkarah Lengpui airport an chhuahsan tawh a. Mizoram Police hi mi 70 vel bawr Lengpui airport atan hian dah an ni thin a. An ni pawh hi vawiinah an chhuak ve nghal a. An zavai chuan an chhuahsan lo ang a, mi 8 bawr vel nitin an la duty tel ve ang a, an ni hian ILP enfiah hna an la thawh chhunzawm dawn a ni.

Lengpui airport atangin Vanlalruata Akashvani News Aizawl

Kum 1999-a Indian airlines thlawhna IC-814 suam a nih khan CISF in airport te venhim hna thawh tula an hriat tan thu sawiin kum 2000-ah a hmasa ber atan Jaipur airport venhim hna an thawk tan a. Tunah hian airport 68 an venghim mek a, airport thar pahnih dang venhim hna thawk turin an inbuatsaih mek tih he hunah hian tarlan a ni.

<><><>

CYMA

Central YMA ruihhlo do pawl, Central Anti Drugs Squad (CADS) ten ruihhlo No. 4 (Heroin) Hawng 400 an man a, Cheng Nuaih za sawm pahnih man hu vela chhut a ni.

Hun engemaw chen an lo veh tawh hnuaiah CADS chuan tuki dar 03:00 vel khan lirthei pahnih leh a khalhtu mi pahnih nen Saitualah an man a, ruihhlo hi lirthei pahnih atangin man a ni a, Thangsangpuia, kum 28, Zawra Veng, Farkawn khua tuna Ramhlun North a cheng mek ni a in sawi khalh atangin Hawng 200 an man a, Malsawmdawnga, kum 29, Zawra Veng, Farkawn khua tuna Khawmawi, Myanmar a khawsa mek nia in sawi hnen atangin Hawng 200 bawk an man a ni,

Lirthei khalhtu te hian an lirthei khalhte chu Lalhmingmawia Ngur Khua, Champhai District ni a an hriat, Zokhawthar leh Khawmawi, Myanmar lamah te a khawsa kual thin ta niin an sawi a. Heng an ruihhlo phurh pawh hi ama ta vek niin an sawi bakah Lalhmingmawia nen hian Vairengte daia hnamdang hnenah cheng 80,000 ve ve hlawha, zu hlan tura in be fel an nih thu an sawi bawk. Lirthei khalhtu te in puan zelnaah tun tum hi an vawi 3 kalna chiah niin a vawi 1-naah Hawng 100 ve ve phurin, a vawin 2-naah Hawng 200 ve ve an phur leh a, tunah pawh hian Hawng 200 ve ve an phur leh niin an sawi.

CADS hruaitute chuan Lalhmingmawia hian ruihhlo nasa takin a tawlh tih hriain theih tawpin an chhui reng a, ruihhlo tlawh nana a lirthei hman thin Regn. No. te an hriat hnuaiah an man thei ta a ni an ti. Ruihhlo Hawng 400 leh a phurhna lirthei pahnih leh a khalhtute an man rual hian a neitu tak Lalhmingmawia erawh chu Myanmar lamah a lo tlan chhiat hman avangin man an la ni ve rih lo tih an sawi a a ni.

Heng ruihhlo man te hi Aizawl thlenpui a nih ve leh Home Minister, Pu Sapdanga leh END Minister, Pu Lalnghinglova Hmar ten Central YMA Office panin a hmunah an lo dawngsawng a ni.

<><><>

BORDER TALKS

Mizoram leh Assam ramri chungchanga inbiakna State Secretary-level meeting nei turin vawiin khan Home Secretary Pu Vanlalmawia hovin palai mi 7 in Guwahati khawpui an pan.

Home department atanga thu dawn danin Mizoram leh Assam official-te inbiakna turah hian ramri buai chungchanga a hma lama lo sawi tawh leh state pahnih la inrem theih lohnate sawiho leh a, kimchang taka thil awmdan

inhirilhtawn tura ruahman a ni a. He inbiakna tura Mizoram sawrkar atanga thu ken turte leh pawimawh dang chi hrang hrang te chu tun thla ni 16 khan Home Minister Pu K. Sapdanga hovin sawiho a ni a, Home Minister chuan ramri him tak, mipuite thlamuang taka an khawsak theihna tur nawr chhuah chu an thupui ber a nih thu a sawi.

Pu K. Sapdanga chuan Mizoram tana channa awm lo tura theihtawp chhuah a nih thu sawiin Mizoram leh Assam ramri zirchiang tur Study Group member 4 awmna pawh kumin January ni 25 khan din a ni a ti a, he Study Group hian chhuanawm takin hma an lak thu leh, anni zarah document tan chhan tur pawh an nei tha tawh hlea an inhriat thu a sawi a. Mizoram aiawha ramri chungchang inbiakna a palai kalturte pawh an inpuahchahna a tha thawkhata a hriat thu a sawi baw.

Thudawn danin naktuka Official-te an inbiakna rah chhuah a zirin Mizoram home minister leh Assam border protection & development minister te a vawi ngana atana inbiakna chhunzawm tura ngaih a ni a. Tun tumah hian ni khat chauh inbiak phawt tur a ni a, thil awmdan a zirin official-te inbiak chhunzawm leh rawt a ni mai thei baw a ni.

Voicecast

Mizoram leh thenawm state Assam in kum 2021 July ni 26 a Vairengte dai-a Police-te’n silai hial an hmehpuah avangin ramri buai chinfel dan tur hi chak zawka dap a ni ta a. Hemi kum vek hian Assam border protection & development minister Pu Atul Bora hovin Assam palaite Aizawlah lokalin khatih laia home minister Pu Lalchamlia hovin Mizoram palaite nen an inbia a. A kum leha Aizawlah baw inbe lehin kum 2022 November thla khan Guwahati-ah minister pahnih kaihhruaite hi an inbe leh a. Vawi tam tak state pahnih palaite bakah Chief Minister ve ve pawh inbe pawhin ramri buai erawh chinfel ala ni rihlo a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

FMGE&W ON MUHCS

Mizoram sawrkarin Mizoram Universal Health Care Scheme hnuiaia Medical Reimbursement System thar ah sawrkar hnathawkte phalna la hmasa lova hlawh cut sorkarin a tum avangin Federation of Mizoram Government Employees & Workers (FMGE&W) chuan dan hmanga hmalak ni se an ti.

FMGE&W chuan MUHCS-a huam tir ve lo turin vawi tam tak sawrkarah thlen ani tawh an ti a, MUHCS chu ala fel tawkhlo avangin sawrkar hnathawh hlawh cut chu an duhlo tih sawiin Sawrkar hotu lu hnenah an duhlo thu vawi tam tak an thlen tawh a, heti chung hian kumin April ni 1 ah an hlawh cut na tur Head thlenga siam ani tih sawiin kalphung felfai lo ala nih avangin damlo inenkawlina chungchangah harsatna tawh an awm tih sawiin Dan hre mi te rawn a, dan hmanga hmalak an duh an ti.

Hemi chungchang hi Chief Minister hnenah lehkhah thehluh an tum tih sawiin an ngenna chu sawrkarin a ti hlawhtling lo anih chuan Court ah kal an tum tih an sawi a ni.

Mizoram Universal Health Care Scheme hi nimin khan BCM enkawl Christian Hospital Serkawn chuan zawm phawt ni se, an ti a. hemi atan thil tul dangte chu Damdawi In thunneitu, Hospital Management Committee kutah an dah a ni a, hetihlai hian he scheme kalpuina kawnga a pawimawh tak pahnih Sorkar hnathawkte leh Private Hospital te nena inrem tawna hi ala awmlo a ni.

<><><>

PM

Prime Minister Narendra Modia chuan firfiakte leh anmahni puitute chu an chhui ang a, an zawn chuah hnuah hremna na tak an pe dawn tih a sawi. Vawiina Bihar-a Madhubani district-a National Panchayati Raj Day a hmannaah he thu hi sawiin khawvel kil tawp thlengin firfiakte hi an umzui dawn tih a sawi a. Firfiaka chetna chu hrem lohin an chhuah lo ang a ti a. Pawikhawhtute hnenah an phu ang ngeia rorelna pek chu an tum ber anih thu sawiin rampumin theihtawp an chhuah ang tih a sawi a. Firfiaka chetna avang hian ram chakna hi a hniam phah dawn lo tih a sawi bawk a ni.

<><><>

VISA FOR PAK

Pahalgam firfiaka chetna a thlen hnu lawkah India chuan Pakistan mite tan Visa a tihtawpsak. Tuna Pakistan mi visa pek tawh zawng zawngte hi tun thla ni 27 atangin tih thih vek a ni dawn a. Damlohna thil avanga visa pekte pawh tun thla ni 29 thleng chiah a dam tawh dawn a ni.

External Affairs ministry chuan thuchhuah siamin Pakistan mi leh sa India leilunga la awm zawng zawngte chu visa thih ni hma ngei a chhuak vek turin an hriattir a. India mite pawh Pakistan-a zin lo tura thurawn pe in Pakistan-a India mi awm zawng zawng pawh lo haw vek turin a hriattir a ni.

Hei bakah hian Pakistan lemchan thiam Fawad Khan-a film Abir Gulaal chu India-ah chhuah khatp a ni bawk a. He film hi Aarti S Bagdi-a siam niin thlaleh ni 9 a chhuah theih tura ruahman a ni a. Pahalgam-a firfiakte chetna avang hian sawrkar chuan tihchhuah a khap ta a ni.

Puan tawh angina Pahalgam-a firfiakte chetna chhanlet nan India chuan Pakistan nena Indus Water Treaty 1960 a neih mek chu a titawp. Heng bakah hian Attari Integrated Check Post chu khar nghal a ni bawk. Prime Minister Narendra Modia kaihhruaia Cabinet Committee on Security, CCS thukhawm chuan ramchhungah venhimna khauh taka kalpui nise tiin an rel a. Foreign Secretary Vikram Misri chuan CCS thutlukna zingah Pakistan mite chu SAARC Visa Exemption Scheme (SVES) visa hmanga zin veivah phalna pek thin pawh tihtawp anih thu a sawi a. Tuna SVES Visa hmanga India-a awm mek Pakistan mite chu darkar 48 chhunga India chhuahsan tura hriattir an ni a ti a. CCS thukhawm chuan firfiakte chetna hi na taka a dem thu a sawi bawk a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni baw k ang.

<><><>